

ՍՄՐԱՏ ՍՊԱՐԱԿԵՏԻ ԻՐԱՎԱՔԱՂԱՔԱԿԱՆ ՀԱՅԱՑՔՆԵՐԸ

Գ. 2. ՍԱՏԱՐՑԱՆ

Կիլիկիան հայկական թագավորությունը, որը տևեց շուրջ հինգ դար (1080—1375) հայ մշակույթին տվեց նշանավոր և երևելի գործիչներ: Ներառեց թվում իր արժանի տեղն ունի ականավոր պետական և քաղաքական գործիչ, մեծ զորավար և դիվանագետ, օրենսդիր, օրենսգետ և պատմիչ Սմբատ Սպարապետը (1208—1276)¹: Որպես քաղաքական խոշոր գործիչ, նա խորապես մտահոգված էր հայկական պետականության ամրապնդման, ավատատիրական հարաբերությունների իրավական կարգավորման, ֆեոդալիզմի ծայրահեղ կողմերի հարթեցման, ինչպես նաև ավատատիրական օրինականության պահպանման համար: Կազմելով Կիլիկիան հայկական պետության Դատաստանագիրքը², որի հիմքում ընկած է Մխիթար Գոշի Դատաստանագիրքը³, Սմբատը լուծում է ազգային օրենսգրքի բացակայության հարցը Կիլիկիայում: Չնայած որ Դատաստանագիրքը «կազմվել է անհատական ջանքերով, այնուամենայնիվ, նա ստանում է տեղական ֆեոդալ հասարակության աջքում պետական-օրենսդրական նշանակություն, վայելում է պետական սանկցիայով անցած կողերի արժեք, որովհետև նրա կազմողը հանդիսանում էր հայ կառավարության մեջ առաջնակարգ դեր խաղացող մի անձ, թագավորի եղբայրը, որը թերևս թագավորի առաջադրանքով էր ձեռնամուխ եղել իր օրենսգրքի հորինմանը»⁴: Եթե Գոշի Դատաստանագիրքը, զործող օրենսգրքի լինելուց բացի, նաև մի իսկական գիտական տրակտատ է պետության, իրավունքի և օրենսդրության, դատարանի ու դատավարության և հարակից այլ հարցերի մասին, ապա Սմբատի Դատաստանագիրքը «իսկական օրենսգիրք է, դասակարգային բովանդակությամբ՝ ֆեոդալ-ճորտատիրական կողեր»⁵:

Սմբատ Սպարապետի իրավաքաղաքական հայացքները ուսումնասիրելու համար կարևոր նշանակություն ունի նրա «Տարեգիրքը»⁶, որը կազմելիս Սմբատը օգտվել է տարբեր աղբյուրներից⁷: «Տարեգիրքը» անգնահատ

1 Սմբատ Սպարապետի կյանքի և գործունեության մասին տե՛ս Ա. Գալստյան, Սմբատ Սպարապետ, Երևան, 1961, Ա. Սուքիասյան, Սմբատ Սպարապետ որպես զորավար և դիվանագետ (Բանբեր Երևանի համալսարանի, 1973, № 1, էջ 98—101), Նույնի՝ Սմբատ Սպարապետ որպես պատմիչ, օրենսգետ և օրենսդիր (Բանբեր Երևանի համալսարանի, 1974, № 1, էջ 100—109):

2 С м б а т С п а р а п е т, Судебник (այսուհետև՝ Դատաստանագիրք), составление текста, перевод с древнеармянского, предисловие и примечание А. Г. Галст'яна. Ереван, 1958.

3 Այս մասին տե՛ս էմ. Պիվազյան, Մխիթար Գոշի և Սմբատ Սպարապետի Դատաստանագրքերի առնչակցությունը (Բանբեր Մատենադարանի, № 5, Երևան, 1960, էջ 117—134), Մխիթար Գոշ, Գիրք Դատաստանի, աշխատասիրությամբ՝ Խոսրով Թորոսյանի, Երևան, 1975, Առաջաբան, էջ 16, А. Г. Сукнасян, История Книжной культуры армянского государства и права, Ереван, 1969, с. 185—192 և այլն:

4 Խ. Սամուելյան, Հին հայ իրավունքի պատմություն, Երևան, 1939, էջ 92:

5 Ա. Սուքիասյան, Սմբատ Սպարապետը որպես պատմիչ, օրենսգետ և օրենսդիր, էջ 108:

6 Սմբատ Սպարապետի Տարեգիրք (այսուհետև՝ Տարեգիրք), Վենետիկ, 1956:

7 Տե՛ս Մանուկ Աբեղյան, Երկեր, հ. Դ, Երևան, 1970, էջ 249:

տևի աղբյուր է Կիլիկյան հայկական թագավորության ներքին և արտաքին քաղաքականության հարցերը պարզաբանելու համար:

Ի տարբերություն միջնադարյան հայ մյուս 'մտածողների, Սմբատի իրավաքաղաքական հայացքները կրում են շեշտված աշխարհիկ բնույթ, թեպետ նա ևս չէր կարող լիովին ազատ լինել կրոնաաստվածաբանական մտածողությունից: Այսպես, պետության և թագավորական իշխանության առաջացմանը նա տալիս է աստվածաբանական մեկնաբանություն. «Յառաջ պատեհ համարեցաք զվիճարկեալ դատաւորացն գոել. բան յառաջ զթագաւորացն, վասն զի յԱստուծոյ կարգեցաւ թագաւորութիւնն, եւ յԱստուծոյ տեղին է համարած ի յերկրի»⁸: Մեկ այլ առիթով Սմբատը նշում է, որ «թագաւորքն յԱստուծոյ են կարգած»⁹: Թագավորին համարելով աստծու տեղակալը երկրի վրա, նրան օժտված է համարում բոլոր տեսակի բարեմասնություններով և առաքինություններով: Այսպես, խոսելով Գագիկ Բագրատունու մասին, Սմբատը նշում է, որ նա քաջ էր, «բարետեսիլ և ահարկու, ողորմած և քաղցր ի վերայ ամենեցուն... և օգնականութեամբն Աստուծոյ զօրացեալ խաղաղացոյց աշխարհն ըստ իւրաքանչիւր կերպի, զեկեղեցականս և զիշխանս, զոսմիկս և որ ընդ իշխանութեամբ նորա էին»¹⁰, իսկ լեռն թագավորի մասին ասում է, որ նա իմաստուն էր «եւ հանճարեղ, զուարթ տեսեամբ և առատ սրտիւ առհասարակ առ եկեղեցականս և աշխարհականս, առ աղքատս և առ տկարս»¹¹:

Պետական կառավարման ձևերից Սմբատը ընտրում է իշխանության կենտրոնացված միապետական ձևը և, ըստ այդմ էլ, միապետին օժտում է բացառիկ իրավասություններով. «Եւ թագաւորն մէն է՝ որ կարէ դեկան շինել՝ եւ քաղաք եւ բերդ՝ եւ մեծ գետոց կանգարայ՝ եւ հոգէտուն ի վերայ մեծ ճամփնի եւ ի կապնի երկրին»¹² կամ՝ «Ոսկէհանքն թագաւորին է, եւ արծաթհանքն ի կէս է ընդ երկրին պարոնն եւ ընդ թագաւորն. եւ երկաթն ու պղինձն ու կւայնկն՝ յորում երկիր գտնուի այնոր է»¹³, այնուհետև՝ «Ոսկի եւ ոսկով կտաւ՝ որ ի շահն ուրդի՝ թագաւորին է»¹⁴:

Ինչով է պայմանավորված թագավորի անձի այդպիսի մեծարումը և բայառիկ իրավասության շնորհումը: Սմբատը, տեղյակ լինելով իր ժողովրդի պատմությանը, խորապես գիտակցել է, որ հայկական պետականության կործանման պատճառներից եղել են նախարարական տների կամայականություններն ու կենտրոնախույս ուժերի կործանիչ գործունեությունը, միջֆեոդալական չզարգացած կոիվները: Ընդհանրացնելով իր ժողովրդի պատմությունը, Սմբատը հանգեց իր ժամանակի համար միակ ճիշտ եզրակացությունը. միայն ուժեղ կենտրոնացված թագավորությունը կարող է երկիրը պահպանել կենտրոնախույս ուժերի քայքայիչ գործողություններից և արժատաօին թշնամիների տանձգություններից: Այնպիսով ուժեղ կենտրոնացված թագավորության շահերից, Սմբատը սահմանում է. «Թէ իշխան կամ այլ ոք՝ որ ի թագաւորի ծառութիւն եւ ի հնազանդութիւն լինի, եւ իրք պատճառ այնէ թագաւորին, հայնց որ մեռնի իրաւնաւք»¹⁵: Այս իրավանորմով Սմբատը, նախազգուշացնում է իշխաններին, որ թագավորական իշխանության նկատմամբ՝ ոտնձգության դեպքում, նրանք խստորեն կպատժվեն, և այս առեսա-

⁸ Դատաստանագիրք, էջ 5:

⁹ Նույն տեղում, էջ 81:

¹⁰ Տարեգիրք, էջ 1:

¹¹ Նույն տեղում, էջ 208:

¹² Դատաստանագիրք, էջ 9:

¹³ Նույն տեղում, էջ 13:

¹⁴ Նույն տեղում, էջ 12:

¹⁵ Նույն տեղում, էջ 15:

կետից վերջիններս թագավորի մոտ ավելին չեն, քան իշխանական կալվածքներին իրենց ճորտերը:

Կողմնակից լինելով պետական կառավարման միապետական ձևին, այնուհանդերձ, Սմբատը այն չի հասցնում արևելյան բռնակալության աստիճանի, այլ որոշակի իրավանորմերով սահմանափակում է թագավորի իշխանությունը: Այսպես, թագավորը իրավասու է զրկելու իշխանական իրավունքից միայն այն իշխանին, որին ինքն է շնորհել այդ իրավունքը. «Նւ իշխան՝ զոր ինք թագաւորն լինին իշխանացուցել, նա ինք կարէ ձգել. երբ ու կամի՝ յիշխանութենէն, եւ խրատել ու այնել զինչ իր պիտի: Բայց զայլ ինքնակալք, որ ինքեանք չլինին իշխան դրել, նա չկարէ առանց այլ իշխանաց որ իր ընկերք լինին՝ ոչ զնա աքսորել եւ ոչ ձգել»¹⁶: Ուրեմն այն իշխաններին, որոնք մինչ արքայի թագադրվելն էին իշխանական տիտղոսի աստիճանի հասել, թագավորը, առանց մյուս ֆեոդալների համաձայնության, իրավունք չունի զրկել օրինական իրավունքներից կամ աքսորել երկրից: Սմբատը սահմանում է նաև թագավորի ապրելակերպը. «Չէ իրավունք որ թագաւոր անպսակ սիրդով կենայ. ասու չէ զի Աստուծոյ եւ հայրապետին արինադրակից է. թող արինաւոր ամուսնանայ»¹⁷: Թագավորն իրավասու չէ նաև խառնվելու իշխանների ներքին գործերին. «Մի լիցի թագաւորին յայն ձեռնարկել, այլ իշխանքն զիրենցն ունենան մնացական եւ թագաւորին ուժ տան»¹⁸: Սակայն թագավորները պետք է աշաւուրջ լինեն և բնի մեջ խեղդեն հպատակների անհնազանդության ամեն մի փորձ: Այդ առթիվ Սմբատը Կիլիկիայի թագավորներին հիշեցնում է, որ Գագիկը, զահ բարեանալով. միավորեց «զգօրսն Հայոց, և զնաց ընդ կողմանս աշխարհի հայրենեաց իւրոց, և զանհնազանդսն հնազանդեցոյց, և զհակառակսն հալածեաց»¹⁹:

Ուրեմն, ըստ Սմբատ Սպարապետի, թագավորը համարվում է երկրի գերագույն կառավարիչը և պետական սովբերենության կրողը: Դա իր արտահայտությունն է գտել նաև «Տարեգրքում», որտեղ հայոց թագավոր Գագիկը յայսպիսի խոսքերով է դիմում Բյուզանդիայի կայսրին. «Ով արքայ, ծանիր, զի ես որդի եմ թագաւորացն Հայոց, և թագաւոր ի վերայ ազգին Հայոց, և ամենայն Հայք հնազանդին ինձ»²⁰:

Թագավորական գահի ժառանգման հարցում Սմբատը դրսևորում է առաջադիմական մոտեցում: Այսպես, թագավորի ընտրության հարցում նա չի կառչում հին սովորութային իրավունքին, որ ընդունված էր հայկական պետականության մեջ, այլ, ելնելով պետական ու հասարակական շահերից, սահմանում է այնպիսի կարգ, որի համաձայն թագավորական գահը պիտի ժառանգի արքայորդիներից արժանավորը. «Նւ թէպէտ ու նոմոսով է՝ զանդրանիկն կացուցանել յաթոռ ինքնակալութեանն, բայց վասն աւգտութեան աշխարհաց իրաւունք է՝ որ աղէկ տեսնու հայրն՝ իր ամէն գաւառաւքն եւ գաւառապետացն տեսովն եւ սուրբ եկեղեցովն, որ՝ յոր հաճին յորդոց թագաւորին եւ գիտնան որ բարի բարուք լինի եւ աստուածասէր ու երկիւղով եւ ըռատակն, նա զայն կացուցանեն յաթոռ ինքնակալութեան հաւրն, որ հովվէ զեզրարքն եւ զերկիրն»²¹:

Ողջ միջնադարում պրոբլեմ դարձած աշխարհիկ և հոգևոր իշխանությունների առաջնության հարցը Սմբատը լուծում է աշխարհիկ իշխանության օգտին, «Յառաջ պատեհ համարեցաք զվիճարկեալ դատաւորացն գրել. բան յառաջ զթագաւորացն»²²: Եկեղեցին ճնթարկելով աշխարհիկ իշխա-

¹⁶ Նույն տեղում, էջ 81:

¹⁷ Նույն տեղում, էջ 9:

¹⁸ Նույն տեղում, էջ 14:

¹⁹ Տարեգրք, էջ 37:

²⁰ Նույն տեղում, էջ 64—65:

²¹ Նույն տեղում, էջ 7:

²² Դատաստանագիրք, էջ 5:

նությանը, Սմբատը կարծում է, որ հոգևորականությունը չպետք է զբաղվի աշխարհիկ գործերով. «Ձէ ամենեւին պատեհ որ եպիսկոպոս յոշինչ ազգ գործ աշխարհական եւ ոչ ի բան մերձենայ. քան զամէն եկեղեցւոյն եւ զեկեղեցականացն դատատենորոյն բաներն ուղղէ ի ճշմարիտն, զի չկարէ որ երկուց տէրանց ծառայել՝ որպէս հրամայէ Քրիստոս»²³, իսկ մեկ այլ տեղ նա սահմանում է. «Երէցն պարտ է որ երբ զայս առնու՝ նա հերիք այնչ. ու այլ մարմնաւոր գործ չայնէ եւ այլ չգիտենայ յաշխարհի բանէն, քան զեկեղեցիին մէն եւ զժամն»²⁴, Չնայած այդ սահմանափակումներին, եկեղեցին հասարակութեան արտոնյալ դասերից էր և պետութեան հիմնական հենակետերից մեկը: Այդ են վկայում Դատաստանագրքի մի շարք հոդվածներ, որտեղ օրենքի ուժով պահպանվում է եկեղեցու արտոնյալ վիճակը, ինքնուրույնությունը և ինչքը: Այսպես, Դատաստանագրքի 62-րդ հոդվածն ազդարարում է. «ՁԱստուծոյ երկիւղն եւ զիւր ծանաթութիւնն հրամայէ աւրէնքս ստանալ՝ ըստ Սողոմոնի: Ապա թէ եկեղեցական լինի, նա ընդ սուրբ եւ աղաքինի կարգաւորացն դասն փարի. եւ թէ աշխարհի երէց է, նա արժան է ընդ հարկելուր գիտանքն եւ ընդ մաւտելուր պարոնութեան. ըստ իւրաքանչիւր կերպի յարիլ ի բարին, վասն զի Աստուած զերկնային դաս հրեշտակացն զաստիճանաւորսն արար իւր ի սպասաւորութիւն. եւ զերկրաւորքս նոյնպէս ի տէրութիւն եւ ի պարոնութիւն»²⁵:

Ի տարբերություն Մխիթար Գոշի, Սմբատի Դատաստանագրքում որոշակիորեն շեղումված է ավատատիրական հասարակարգի դասային հիերարխիան: Եթե Մխիթար Գոշը բնական ազատության և հավասարության կողմնակից էր, իսկ մարդկանց անհավասարությունը բացատրում էր տնտեսական պատճառներով²⁶, ապա Սմբատը ոչ միայն չի ընդունում ի սկզբանե մարդկանց հավասարության գաղափարը, այլև անհավասարությունը համարում է բնական, արդարացի և հավերժական. «Կու հրամայէ աւրէնքս, որ մարդկային ազգս շատ ազգեր են, եւ են, որ ազատք են ու հեծելվորք, եւ են որ չեն՝ եւ յայլ ազգ գործերն որ գործ այնն»²⁷:

Ինչպես միջնադարյան ավատատիրական մյուս հասարակարգերը, այնպես էլ կրիկյան հասարակությունը ստորաբաժանվում էր «աղատներին» և «անազատներին», «հարուստներին» և «աղքատներին», որն իր արտահայտությունն է գտել նաև Սմբատ Սպարապետի Դատաստանագրքի իրավանորմերում²⁸: Այդպիսի բաժանման հիմքում ընկած էր մարդկանց և՛ տնտեսական դրությունը, և՛ քաղաքական անհավասարությունը: Ուստի ազատները տնտեսապես և քաղաքականապես ազատ, տիրապետող դասակարգի ներկայացուցիչներն էին: Նրանք թագավորի գլխավորութեամբ կազմում էին ֆեոդալների դասակարգը: Վերջիններս իրենց ձեռքում էին պահում ավատատիրական սեփականություն և արտադրության հիմնական միջոցը՝ հողը, որ օգտագործում էին աշխատավոր գյուղացիությանը՝ «անազատներին» շահագործելու միջոցով:

Իշխող դասակարգը կազմող ազատներն իրենց հերթին բաժանված էին զանազան դասերի՝ աշխարհիկ և հոգևոր, խոշոր, միջին և մանր հողատերերի: Ավատատերերի հիերարխիայի դասակարգումը իր արտահայտությունն է գտել հատկապես Սմբատ Սպարապետի Դատաստանագրքի «Վասն թա-

²³ Նույն տեղում, էջ 24:

²⁴ Նույն տեղում, էջ 76:

²⁵ Նույն տեղում, էջ 64:

²⁶ «Ազատ յԱրարչն եղև մարդկայինս բնութիւն, այլ ծառայել տէրանց յաղաղս պիտոյից եղև հողոյ և ջրոյ» (Մխիթարայ Գոշի Դատաստանագրքի Հայոց իրավաբանական հետադոտութիւնը հանդերձ ծանոթութեամբ Վ. ծ. վ. Բաստամանյան, Վաղարշապատ, 1880, էջ 320):

²⁷ Դատաստանագրքի, էջ 148:

²⁸ Տե՛ս Դատաստանագրքի Բ, Ե, ԺԸ, ԿԳ, ԿԶ, ԶԶ և այլ համապատասխան հոդվածները:

գաւորաց, իշխանաց եւ ձիաւորաց, որ ի Հայս ազատ կոչին ի դատաստանաց» հոգւածում, որտեղ մասնավորապես նշված է. «...Սւ զիշխանքն դատէ իշխանաց իշխան՝ իշխանաւքն եւ իրենց տեսովն. նոյնպէս եւ զազատքն՝ որ են ի մերս ձիաւորքն եւ լիճ ճորտերն՝ նա իրենցովն զիրենք դատեն իշխանաց իշխանքն. զթաղաւորին ճորտերն՝ թաղաւորին հրամանաւքն»²⁹, Ֆեոդալական հիերարխիայի ճնշման ամբողջ ժանրութիւնն ընկած էր չքավոր ժողովրդի ուսերին:

Տիրապետող դասակարգի մյուս խոշոր դասը հոգեւորականութիւնն էր, որը, ըստ Սմբատ Սպարապետի Դատաստանագրքի «Վասն կենցաղավարութեան կարգաւորաց» հոգւածի, տրոհւում էր ինը կարգերի, որտեղ մտնում էին կաթողիկոս-պատրիարքները, արքեպիսկոպոսները, եպիսկոպոսները, վարդապետները, քահանաները, սարկավագները և այլք: Հոգեւորականութիւնը համարվում էր «ազատների» դաս, այսինքն՝ ինչպես աշխարհիկ ավատատերերը, ազատ էր հարկերից: Տեղին է նշել, որ ոչ միայն կաթողիկոսը, այլև հոգեւոր դասի մյուս խոշոր ներկայացուցիչներից շատերը՝ արքեպիսկոպոսներ, եպիսկոպոսներ և վարդապետներ, սերում էին իշխանական և ազնւական տոհմերից: Այդ պատճառով էլ հոգեւոր դասը խոշոր և ազդեցիկ խավ էր պետութիւնում և վայելում էր թագավորների նյութական ու քաղաքական աջակցութիւնը³⁰:

Հասարակութեան մյուս մասը՝ «անազատների» խումբը, բաղկացած էր ընչազուրկ խավերից, որը բաժանվում էր. ա) պետական գյուղացիներ, բ) կախյալ գյուղացիներ, գ) պառիկոսներ և դ) ստրուկներ: Շինականները (պետական և կախյալ գյուղացիները), ըստ Սմբատի Դատաստանագրքի, համարվում էին որոշակի իրավահարաբերութիւնների սուբյեկտներ, մասնավորապես ունեին իրենց հողամասերը՝ օգտագործման իրավունքով, իսկ «ազատ գյուղացիները» ոչ միայն անձնական ազատութիւն էին վայելում, այլև իրենց հողամասերին տիրում էին սեփականատիրական իրավունքով: Հասարակութեան ամենաստորին դասերը՝ պառիկոսները և ստրուկները, չէին ճանաչվում որպես իրավունքի սուբյեկտներ, այլ դիտվում էին որպես իրավունքի օբյեկտներ: Զբաղւոր գյուղացիների մեծ մասը պառիկոսներ էին, այլ խոսքով՝ ճորտ գյուղացիներ, որոնք որպես կանոն զուրկ էին տնտեսական միջոցներից և կրում էին ավատատիրական շահագործման հիմնական լուծը:

Ըստ Դատաստանագրքի, ստրկութեան աղբյուրներ են եղել. ա) գերեվարումը պատերազմում բ) ծնունդը ստրկից՝ տիրոջ տանը գ) դատարանի վճռով շինականի դատապարտումը՝ հանցագործութիւն կատարելու համար դ) առուծախը. ստրուկներին վաճառում և գնում էին որպես սովորական ապրանք ե) պարտապանի անվճարունակութիւնը, որը նրան ստրուկ էր դարձնում մինչև փրկագնումը³¹:

Ինչպես նշեցինք, ստրուկը չէր համարվում իրավահարաբերութեան սուբյեկտ, այդ իսկ պատճառով նա չէր կարող ազատ մարդու ժառանգորդ լինել, եթե ստրկատերը դրա համար չէր տալիս իր համաձայնութիւնը: Առանց նրանց համաձայնութեան չէր կարելի ստրուկին հոգեւոր կոչում շնորհել: Ոչ քրիստոնյա ստրուկը համարվում էր անվտանգ և ստրուկ էր թնկում: Նա ազատագրվել կարող էր քրիստոնեական հավատ ընդունելու դեպքում միայն՝ տիրոջը փրկագին վճարելու պայմանով³²:

29. Նույն տեղում, էջ 82:

30. Նույն տեղում, էջ 70—71:

31. Նույն տեղում, էջ 132—134:

32. Ընդհանրապես պետք է նշել, որ ստրկութիւնը բավական տարածված երևույթ էր Կիլիկիան հայկական թագավորութիւնում: Կիլիկիան հատկապես XIII դ. կեսերին համարվում էր ստրուկների վաճառող շուկաներից մեկը: Ստրուկներ բերում էին տարբեր երկրներից, նրանց վաճառքով զբաղվում էին եվրոպացի և մահմեդական առևտրականները (տե՛ս Գ. Գ. Մաքսալեյ, История Киликийского государства, Ереван, 1952, с. 282):

Այսպիսով, պարզորեն ուրվագծվում է Ղատաստանագրքի դասակարգային էությունը, որտեղ օրինականացվել են ավատատիրական դասային կառուցվածքը, ունևորների և ընչազուրկների տնտեսական և իրավական անհավասարությունը:

Ուշագրավ են Սմբատի հայացքները իրավունքի և օրենսդրության նպատակի, օրինականության, ամուսնաբնական, քրեաիրավական, աշխատանքի պաշտպանության, հրեխանների կրթության, պատերազմի և խաղաղության հարցերի վերաբերյալ: Ըստ նրա, իրավունքի նպատակն է ծառայել հասարակության բարօրությանը. «Եւ արդ քցեցի զսա վասն հաստատութեան սրբոյ եկեղեցւոյ եւ գոյանալոյ երկրի. և ապա վասն աշխարհական դատաւորաց եւ թագաւորաց»³³:

Սմբատը ընդհանրապես տարբերում է իրավունքի հետևյալ տեսակները. ա) աստվածային, բ) աշխարհիկ (պետական), գ) եկեղեցական: Օրենքների հիմքը՝ աստվածային իրավունքն է՝ տրված Մովսեսի, Ավետարանի, առաքյալների և եկեղեցու հայրերի միջոցով: Աստվածային իրավունքը մշտնջենական և հավիտենական է: Աշխարհական օրենքները, օժտված լինելով հարկադրանքի ուժով, պետք է դիմակայեն իրավախախտումները. «...դատաստանն բնաւ չունի քաւութիւն եւ ոչ խղճալ մեղանշականին... որ ի դատաստանն ընկնի՝ նա տայ իրաւունքն դարձնել զուժն եւ ըմպել զբաժակն, զոր ինք ընկերին իմացոյց. հայնց ցասմամբ, զինչ այն ուժն արժենայ, զոր արել լինայ՝ նա իրաւունքն այն չափով տայ իր»³⁴:

Եկեղեցական կանոնները կոչված են կարգավորելու ինչպես հոգևորականության վարքագիծն ու ապրելակերպը, ամուսնաբնական հարաբերությունների մի մասը, այնպես էլ «բուժելու» ուղղելու այն հանցագործներին, որոնց վնասակար արարքները նվազ վտանգավոր են և որոնք մեղանշել կամ յղջացել են իրենց արարքի համար. «Կանոնք բերդ է, եւ երբ մեղանշական, իր բերնովն ասէ գիր մեղանքն՝ նա ապաշխարութեամբ քաւել տան, եւ զէգ ի բերդ մտաւ՝ նա փրկեցաւ ի մահուանէ... Ամ թէ զղջայ ու յեկեղեցին դիմէ եւ ի կանոնքն՝ նա տան անուշութեամբ դարձնել զրկանքն ու քաւել զմեղանքն»³⁵:

Նոսելով ամուսնաբնական հարաբերություններում Սմբատի արժարժած առաջադիմական հայացքների մասին, պետք է նշել, որ նա ձգտել է ամուսնաբնական իրավանորմերով ամրապնդել ընտանիքը, որը պետության և հասարակության կայունության և ամրապնդման կարևորագույն միջոցն է: Հետևելով Սահակ Պարթևի կանոնախմբին³⁶, նա սահմանում է, որ ամուսնությունը պետք է տեղի ունենա որոշակի տարիքի հասած ամուսնացող զույգերի կամավոր համաձայնությամբ. «Կու հրամայէ աւրէնքս՝ պսակ որ տղայի լինի, որ քան զտասնութինգ տարին պակաս լինի՝ նա չէ ընդունած այն պսակն. եւ երբ զիր հասակն առնու, որ ԺԾ տարին լինի՝ նա կարէ թողուլ զկինն ու ասել, թէ ես չունէի զիմ հասակն ու չգիտէի. ու է իրաւ Բահանայ՝ որ զայս այնէ որ անհասակաց պսակ այնէ, եւ կամ զայնոք որ ակամայ՝ առանց իրար հաճելոյ հավնել են բռնադատութեամբ ազգացն՝ պսակէ՝ նա զկարգն կորսնէ»³⁷: Դեռ ավելին. Դատաստանագիրքը պաշտպանում է կնոջ պատիվն ու արժանապատվությունը և մեղադրում այն տղամարդկանց, որոնք առանց «խրաւանց» թողնում են իրենց կնոջը և ամուսնանում ուրիշի հետ, դրանով իսկ ոտնահարելով «ամուսնական պսակը»: Նմանների նկատմամբ Սմբատը սահմանում է խիստ պատիժներ³⁸: Սմբատ Սպա-

³³ Դատաստանագիրք, էջ 4:

³⁴ Նույն տեղում, էջ 161—162:

³⁵ Նույն տեղում:

³⁶ Տճ՝ Կանոնագիրք Հայոց, Հ. Ա, աշխատասիրությամբ՝ Վազգեն Հակոբյանի, Երևան, 1964, էջ 382:

³⁷ Դատաստանագիրք, էջ 105:

³⁸ Նույն տեղում, էջ 100:

րապետը գտնում է նաև, որ եթե նույնիսկ տղամարդը կնոջը տեսնի անհավատարմության մեջ, ապա «...սպանեն չէ հրամայած, այլ թողուն»³⁹, նա պաշտպանում է նաև խորթ, որը երեխաների շահերը. «Եւ թէ անհանգրստութիւն լինի ի յայրուկնաց մէջ, եւ վասն խորթերոյ լինի պատճառն՝ նա պատեհ է, որ թէ պոմնով չլինի շալկել այրիկն զխորթերն՝ ի մար առնուլն նա տան զխորթերն ի յազգն, որ հանգչին»⁴⁰:

Ընդհանրապես Սմբատ Սպարապետը մեծ ուշադրություն է դարձնում երեխաների պաշտպանության, դաստիարակության և կրթության հարցերին: Դեռևս IV դ. հայ մտավորականությունը մտահոգվել և առաջ է քաշել երեխաների դաստիարակության և ձրի ուսուցման անհրաժեշտությունը⁴¹: Սմբատ Սպարապետը նույնպես շարունակել է իր նախնիների բարի գործը և հատուկ իրավանորմով ձգտել է արմատախիլ անել իր ժամանակաշրջանում լայն տարածում գտած ուսուցման հիմնական մեթոդը՝ ծեծը. «Եւ թէ յուսցնելն վարդապետ զաշակերտ քշտէ ու մեռնի, նա նոյնն սպաննաւ չէ»⁴², Ուրեմն, ուսուցման կամ դաստիարակության ժամանակ երեխային ծեծելը, որ մահ է առաջացնում, նույնպես մարդասպանություն է:

Սմբատ Սպարապետը դնում է նաև ձրի ուսուցման հարցը, որը նույնպես իր ժամանակաշրջանի համար առաջադիմական գաղափար էր, և այն բարձրացնում օրենքի աստիճանի. «Կու հրամայէ արէնքս, որ բնաւ վարդապետ վարձ չառնու վասն գրոց կարդալոյ կամ այլ գիտութեան եկեղեցոյ ուսմանց. իսկի չէ պատեհ վարձ առնուլ եւ ապա ուսուցանել»⁴³: Ավելին. նույն իրավանորմը պարտավորեցնում է եպիսկոպոսին՝ ուսուցման հետ մեկտեղ հոգ տանել որը երեխաներին. «Ապա կու հրամայէ օրէնքս զորքերն եւ զտառապետներն ստածել եւ խնամել եւ անուշացնել ի գործ որ շատք դիմեն ու գան ի ուսումն: Եւ տայ եպիսկոպոսն ու կարաւղ վաներոյն հայրապետերն այնոնց կերակուր եւ հանդերձ. եւ թէ կարող լինին տէրքն տղայոց նա զհանդերձն մէն տան»⁴⁴:

Քաղաքացիական-իրավական հարաբերություններում նույնպես Սմբատն արտահայտել է այնպիսի գաղափարներ, որոնք ուշադրության արժանի են: Այսպես, Դատաստանագիրքը, ելնելով պարտապանների շահերից (այդպիսիները, որպես կանոն, հասարակության ընդազուրկ դասի ներկայացուցիչներից էին), սահմանափակում է գրավի ենթակա իրերի ցանկը. արգելվում էր պաշտատիրոջ մոտքը պարտապանի տուն, որը դիտվում էր որպես ուժի գործադրում և հակաօրինական արարք: Գրավ կարելի էր վերցնել միայն դատարանի վճռով, այսինքն, օրինական ճանապարհով: Գրավի ենթակա չէին աշխատանքի գործիքները և կյանքի համար անհրաժեշտ առարկաները. «Եթէ քեզ ոք պարտք պարտենայ՝ նա մի մտեր ի յիր տունն՝ որ ընդ ներքս ուր էր գրաւկանն գրաւկենել. զի արէնքն զայնպիսի այնելիքն հանաւորումն է համարել. քաւել թէ դարպասուն հրամանաւք եկ թէ դեռ ու մարդ այլ ուզես ի հետդ՝ նա պատեհ է... ամենևին լուծք եզանց չէ պատեհ գրաւկել. զի գոյացութեան եւ ապրնաց է պատճառք»⁴⁵:

Ավատատիրական հասարակարգի պայմաններում նման իրավանորմի գոյությունը ավելի քան առաջադիմական էր: Համենայն դեպս, այն որոշակի շահով պատենջ էր կանգնում չափն անցած տերերի ոտնձգություններին և ամեն տեսակի շահագործմանը:

Հանցագործության՝ որպես իրավական հասկացության, ընդհանրացված բնորոշում չկա Սմբատի Դատաստանագրքում: Այդպիսի բնորոշում չկա նաև

³⁹ Նույն տեղում, էջ 93:

⁴⁰ Նույն տեղում, էջ 91—92:

⁴¹ Տե՛ս Կանոնգիրք Հայոց, հ. Ա, էջ 373, 377 և այլն:

⁴² Դատաստանագիրք, էջ 32:

⁴³ Նույն տեղում, էջ 76—77:

⁴⁴ Նույն տեղում, էջ 77:

⁴⁵ Նույն տեղում, էջ 116:

միջնադարյան ողջ իրավական հուշարձաններում: Սակայն Դատաստանագրքի մի շտրք նորմերում, մասնավորապես 190-րդ հոդվածում նշմարվում է այն միտքը, որ հանցագործներ չեն ծնվում, այլ հանցագործությունը մարդու ազատ կամքի դրսևորման ձևերից մեկն է, որի հետևանքով նա ոտնահարում է աստվածային և աշխարհական օրենքները և վնաս պատճառում ուրիշներին. «Եւ մեղանչելն կամաւք չէ քանց իրք, որ արհամարհէ ոք զԱստուծոյ հրամանն եւ զդատաւորացն ու զիրաւանացն ահն մոռնայ ու ի հետ ձգէ ի մտաց. եւ այնով ստէ իր ընկերոջն և խլէ եւ յափշտակէ ու վնասէ, եւ ապա յանկից ծնանի այլ մեծ շար, տուրտվութիւնք եւ սուտ երդումնք ևւ այլ բազում շարիք»⁴⁶:

Ըստ Դատաստանագրքի, հանցագործություն սուբյեկտը մարդն է և այն էլ մեղսունակ և որոշակի տարիքի հասած⁴⁷: Որքան էլ ծանր լինեն հանցագործության հետևանքները, եթե հանցագործը անմեղսունակ է, ապա նա ազատվում է պատասխանատվությունից. «Եթէ ոք ընդ դիւահարութիւն ի ներս անխել եւ դիւուն միջնորդութեամբ մարդ սպաննէ՝ նա պատեհ է աղէկ ստուգել, որ վստահի հայնց է ու առանց ոխութեան՝ նա այն կանոնացն է հասել, եւ ոչ դատաստանի... նոյնպէս եւ ամէն իրք որ դիւական լինի ստոյգ՝ նա կանոնացն է գործ եւ ոչ դատաստանաց»⁴⁸: Սմբատը տարրերում է մեղսունակության հետևյալ ձևերը. «կամաւոր» (դիտավորություն), «ակամայ» (անզգուշություն) և «խառը»: Մեղքի հիշյալ ձևերը Սմբատը բերում է սպանությունների կապակցությամբ: Նա կամավոր է համարում այն սպանությունը, որում առկա է հանցագործի կամքը, դիտավորությունը, կանխամտածվածությունը: «Ակամայ» կոչվող սպանության դեպքում չկա դիտավորություն, սպանությունը տեղի է ունեցել անկախ նրա կամքից (պատահականության կամ անզգուշության հետևանքով): «Խառը» մեղքով կատարված սպանությունները իրենց մեջ պարունակում են և՛ դիտավորություն, և՛ անզգուշության տարրեր: Այդ մասին են վկայում Դատաստանագրքի մի շարք հոդվածներ, մասնավորապես 180, 181, 182 և այլն: Այսպես, օրինակ, անզգուշ սպանություն է համարվում հետևյալը. «Եւ թէ մարդ փայտ կենայ ու կոտրէ, նա փրթի կացինն ու դիպի եւ մարդ սպաննէ. եւ թէ փայտ կամ բոք գլէ, նա գայ դիպի ու սպաննէ»⁴⁹: Իսկ «կամաւորն այն է, որ տայ բրով եւ զմէկայլն ի վտր դնէ ու սպաննէ, կամ քարով քշտէ, նա այն հայնց է զէդ երր թրով էզարկ ու էսպան»⁵⁰ և այլն:

Սմբատ Սպարապետը առաջ է քաշել այն գաղափարը, որ անձը պետք է պատասխանատվության ենթարկվի միայն իր կատարած արարքի համար, որի մեջ նա մեղադրվում է, այսինքն՝ Դատաստանագրքում Սմբատը իրավական ձևակերպում է տվել քրեական իրավունքի կարևորագույն սկզբունքներից մեկին՝ պատժի և պատասխանատվության անհատականացման սկզբունքին: Այն ուղղված էր հին և միջին դարերում լայն տարածում գտած օբյեկտիվ ֆիզիկական մեղսայնացման ինստիտուտի դեմ, երբ պատասխանատվության նախապայմանը համարվում էր վնաս պատճառելու կամ կատարված հանցավոր արարքի սոսկ փաստը: Չընդունելով օբյեկտիվ մեղսայնացման ինստիտուտը, Սմբատ Սպարապետը ընդունում և զարգացնում է այն միտքը, որ քրեական պատասխանատվության հիմքում պետք է ընկած լինի անհատական մեղքը: Պատիժը պետք է կիրառվի հանցագործության մեջ մեղադրվող անձի նկատմամբ՝ սուբյեկտիվ մեղսայնացման սկզբունքին

⁴⁶ Նույն տեղում, էջ 162:

⁴⁷ Տեղին է նշել, որ միջնադարյան իրավական հուշարձաններում, որպես կանոն, հանցագործության սուբյեկտներ են համարվել նաև կենդանիները, նույնիսկ առարկաները (տե՛ս Курс советского уголовного права, часть общая, т. I, Л., 1978, с. 395):

⁴⁸ Դատաստանագրք, էջ 166:

⁴⁹ Նույն տեղում, էջ 154:

⁵⁰ Նույն տեղում, էջ 155:

համաձայն: Առաջնորդվելով այդ սկզբունքով, Սմբատը սահմանում է, որ հայրը չպետք է քրեական պատասխանատվության ենթարկվի իր որդու կատարած հանցավոր արարքի համար և, ընդհակառակը, որդին ենթակա չէ պատասխանատվության ու պատժի՝ հոր հանցագործության համար. «...եթե որդի՝ որ արինաւք ի մահապարտութիւն ընկնի, նա հայրն ի յայն չէ պատեհ, որ բռնվի, եւ ոչ եղբայր վասն եղբար: Հայնց որ, դեռ թէ հայրն կամենայ զինք պատրան տալ որդւոյն ի մեղանքն՝ նա չէ պատեհ առնուլ, ապա դատաստանս հրաման տայ՝ որ զամէն մարդ իր զխովն սպաննեն»⁵¹: Բերենք մի օրինակ ևս. «Թէ իշխան կամ այլ ոք՝ որ ի թագաւորի ծառութիւն եւ ի հնազանդութիւն լինի, եւ իրք պատճառ այնէ թագաւորին, հայնց որ մեռնի իրանաւք, նա եղբարքն եւ որդիքն՝ որ յառաջագոյն լեալ լինին՝ նա վասն հաւր մեղացն չլինին զրկածք ի հայրենեացն ի ժառանգութենէ»⁵²:

Ճիշտ է, վերոհիշյալ իրավանորմերում պահպանվում է պատժի անհատականության սկզբունքը, սակայն, նորմերի հետագա շարադրանքում Սմբատը մեկ քայլ հետ է նահանջում դրանից և ազդարարում. «...բայց որդիքն ի հաւր մահապարտութիւնն բռնվին՝ այնոնք, որ յետ անհաւաժութեանն են ծնած, նոյնպէս եւ կինն. ապա այնոք որ յառջեւ լինին ծնած՝ ազատ են, մահ չպարտին, եւ կան համարձակութեամբ»⁵³: Սակայն այստեղ պետք է նկատել, որ հոր հանցագործությունից հետո ծնված որդիները և կիները, եթե ենթարկվում են պատասխանատվության հոր հանցանքի համար, ապա նրանց նկատմամբ շատ ավելի նվազ խստության պատժատեսակ է սահմանված, քան հանցավոր հոր համար: Այդուհանդերձ, ըստ Սմբատ Սպարապետի Դատաստանագրքի, հստակ դրսևորվում է այն միտումը, որ պատասխանատվության պետք է ենթարկվի նա, ով իսկապես մեղավոր է կատարված հանցանքի մեջ:

Պատիժը նշանակելիս, պետք է հաշվի առնել նաև հանցագործի տարիքը, հանցանքի շարժառիթները, միտումները, բարոյահոգեբանական վերաբերմունքը կատարած արաքի նկատմամբ⁵⁴: Պատժաչափը պետք է համապատասխանի կատարված հանցանքի վտանգավորության աստիճանին: Այսպես, խոսելով հրդեհից առաջացած վնասի հատուցման չափի մասին, Սմբատը սահմանում է. «...եւ թէ կամաւք էր ու վասն չարութեան՝ նա զվզենն վճարէ ու կամ զինքն այրեն. եւ թէ յոչ կամաց՝ ի հեռուէ բերէ հողմն՝ նա զկէսն, եւ թէ ի մաւռէ՝ նա միատակ վճարէ: Եւ յայսոր վերայ՝ զինչ որ տեսնուն զբանն որ լեալ լինայ, նա այնոր վերայ այնեն զիրաւունքն»⁵⁵:

Սմբատ Սպարապետը առաջ է քաշել նաև անհրաժեշտ պաշտպանությունների ինստիտուտը, որի դեպքում նույնպես անձը չի ենթարկվում քրեական պատասխանատվության: Այսպես, Դատաստանագրքի ՃԿԳ հոդվածն ազդարարում է, որ եթե անձը գործել է անհրաժեշտ պաշտպանության սահմաններում և որի ընթացքում սպանել է գողին կամ ավազակին, ապա ոչ միայն չպիտի ենթարկվի պատասխանատվության, այլև նրա արարքը գովասանքի է արժանի. «Կու հրամայէ արէնքս, որ թէ ոք կենայ ու երթայ իր ճամբովն, եւ այլք կենան ու պահեն զճանապարհն որ սպաննութիւն այնեն կամ գողութիւն, ու այն հալալ գնացաւն յաջող լինայ ու գնոքս սպաննէ՝ նա չէ արեան պարտական, այլ գովելոյ եւ աւթիթք տալոյ է արժան... բայց կարգ չկայ՝ որ քաշէ, եւ ոչ տուգանք ի դարպասն՝ վասն սպաննութեանն»⁵⁶:

Ինչպես Մխիթար Գոշի, այնպէս էլ Սմբատ Սպարապետի Դատաստանագրքի քրեաիրավական նորմերը կրում են դասակարգային բնույթ, և այդ

51 Նույն տեղում, էջ 115:

52 Նույն տեղում, էջ 15:

53 Նույն տեղում, էջ 115:

54 Նույն տեղում, էջ 157:

55 Նույն տեղում, էջ 135:

56 Նույն տեղում, էջ 142—143:

տեսակետից պատժի հիմնական նպատակն է ավատատիրական իրավակարգի ամրապնդումն ու պաշտպանությունը ամեն տեսակ ոտնձգություններից: Սակայն, պատժական քաղաքականության այս հիմնական նպատակից բացի, մեր մտածողները կարծում էին, որ պատիժը պետք է հետապնդի նաև մարդկանց ուղղելու, վերադաստիարակելու նպատակ: Այս իմաստով, Սրմբատ Սպարապետը, որպես կանոն, դեմ էր պատիժ-հատուցման թալիոնի սկզբունքին, որը, ինչպես հայտնի է, իր արտահայտությունն է գտել մովսիսական օրենսդրությունում և միջնադարյան իրավական մի շարք հուշարձաններում: Մմբատ Սպարապետը, որպես ավատատիրական իրավակարգի պետական խոշոր գործիչ և զաղափարախոս, կանգնած էր ավատատիրական օրինականության պահպանման դիրքերում: Արդարադատությունը, ըստ Սրմբատի, պետք է իրականացվի օրենքի և օրինականության հիման վրա: Օրինականությունը պետք է պահպանվի բոլորի կողմից, այդ թվում նաև թագավորի: Երկրի գերագույն կառավարիչը պարտավոր է անաչառ դատավարություն իրականացնել և, ընդհանրապես, վերահսկել արդարադատությունը, որպեսզի այն լինի անկաշառ և օրինական. «...պարտի թագուրն զիր իրաւունքն տանել ըղորդ, անաչառութեամբ եւ առանց կաշառոյ եւ առանց ծուլութեան. եւ զամենայն զրկելոցն եւ զգանգատուորացն դարպաս բռնէ եւ իրաւունք այնէ»⁵⁷: Այդ իսկ ֆոռմով նա ցավով է նշում դատավորների կաշառակերությունը և պահանջում այդպիսիների նկատմամբ խիստ պատիժներ. «Կու հրամայէ արէնքս եւ առաքելական իրաւունքս, որ թէ եկեղեցական դատարոր եւ թէ աշխարհական լինի՝ ու ճշմարտի ի վերայն որ թէ՛ դԱստուծոյ իրաւունսն կաշառոց կու ծախէ, նա ձգեն զինք ի դատաւորական աթոռոյն և զէդ աստուածածախս տուժեն. զի գԱստուծոյ իրաւունս ծախեց Յուդայի պէս»⁵⁸:

Կանգնած լինելով ավատատիրական օրինականության դիրքերում, Սրմբատը որոշակիորեն պաշտպանում է նաև ընչազուրկ դասի տարրական իրավունքները. «Եւ այլ կու հրամայէ արէնքս որ թէ մարդ ուժ այնէ տառպել՝ մարդոյ, եւ զիր վարձն ի յիր պոմանն չվճարէ՝ կամ կտրէ, ու գայ դատրստնի տառպելն, նա դարպասն վճարել տայ, եւ հանչաք մի այլ տուգանք ի դարպասն տայ»⁵⁹: Նա սահմանում է նաև հարկերի ու տուրքերի կայուն ու որոշակի չափ, որը ենթակա չէ փոփոխման առանց թագավորի իմացության: «Ձգաւառաց հարկն սահմանովն որ սահմանած է՝ առնուն պարոնայք. եւ չիշխէ ոք՝ յայն որ առանց թագուրին դիր յաւելցնէ», բայց՝ «Եւ թագուրն պարտի որ պահէ զաղքատն»⁶⁰: Դեռ ավելին, այն թագավորները, որոնք անազնիվ են և անկարող երկիրը կառավարելու, ենթակա են գահընկեց լինելու. «...գայն ոք (թագավորը—Գ. Ս.) որ մարգիկք դնեն, նա՝ թէ՛ հայնց պիղծ լինին, որ չկարէ հանդուրժել աշխարհն, նա այլվայ իրենք եկեղեցովն եւ ամէն բնակչաւք երկրին կարեն աքսորել»⁶¹:

Մմբատը հայ իրավաքաղաքական առաջագիմական ավանդույթներին համաձայն է գնահատում նաև պատերազմի և խաղաղության հարցերը: Նա աննպատակ, անարդարացի պատերազմների կրքոտ հակառակորդ էր. «Կու հրամայէ արէնքս, որ թէ ոք ի քրիստոնէից ի յիր ընկերոջ երկիր յիշվէ ու ծեծ այնէ, նա մահու կորուստ բերէ՝ բարհակ անարինաւք՝ նա նզոված է»⁶²: Այդպիսի պատերազմների հրահրիչներին ու կազմակերպիչներին պահանջում է խիստ պատասխանատվության ենթարկել. «Եւ ի կռիւ ուր թագաւորն արդի՝ նա երբ սուրն վերնա՝ նա չէ պատհհայ մարդ սպաննել-

57 Նույն տեղում, էջ 9:

58 Նույն տեղում, էջ 20:

59 Նույն տեղում, էջ 145—146:

60 Նույն տեղում, էջ 13:

61 Նույն տեղում, էջ 81:

62 Նույն տեղում, էջ 149:

քաւէլ, թէ հայնց մարգիթ լինին յայլազգեացն, որ այն շմորոյն պատճառք լինին լեալ»⁶³, Սմբատը խաղաղութեան և ժողովուրդների բարիդրացիական հարաբերությունների կողմնակից էր: Այդ է վկայում նաև նրա դիվանագիտական առաքելությունը, երբ նրա անմիջական բանակցությունների շնորհիվ հնարավոր դարձավ հայ-մոնղոլական դաշինքի կնքումը⁶⁴: Նա մտահոգված էր հայրենիքի սահմանների պաշտպանությամբ. «Այլ կու հրամայէ Մովսէս՝ թէ մի խլէր զհնոց սահմանաց սինաւոն քու սինաւոկցելոյն, բայց քո ըղորդութեամբ պահէ զղորդ իրաւնաւք. հայնց որ թէ խլած լինի՝ նա իրաւնաւք դարձնէ ու առնու, եւ ոչ ուժով. եւ թէ ոչ, նա տուժի ի դարպսէ եւ յիրաւանց»⁶⁵: Եվ մինչև իր կյանքի վերջը նշանավոր գործավարն ու դիվանագետը, պատմիչը, օրենսգետը և օրենսդիրը հավատարիմ մնաց իր պատգամին. արդեն ալիհեր ծերունի՝ սուրբ ձեռքին ընկավ հայրենիքի պաշտպանության համար:

Այսպիսով, Սմբատ Սպարապետը իր Դատաստանագրքով, ճախ, ամրապնդել և օրինականացրել է ավատատիրական շահագործումն ու իրավակարգը: Երկրորդ, ձգտել է իր սահմանած իրավանորմերով որոշակի կայուն մակարդակի վրա պահել հասարակական հարաբերությունները և մեղմացնել դասակարգային սուր բախումները: Երրորդ, կանգնած լինելով ֆեոդալական օրինականության դիրքերում, ցանկացել է սանձահարել ավատատերերի կամայականությունները և, միևնույն ժամանակ, խրատել ստորիններին, որպեսզի վերջիններս հուլ-հնազանդ ծառային իրենց տերերին: Այսքանը հետապնդում էր միայն մեկ նպատակ՝ կայուն և անսասան պահել ավատատիրական հասարակարգը:

ПОЛИТИКО-ПРАВОВЫЕ ВЗГЛЯДЫ СМБАТА СПАРАПЕТА

Г. Г. САФАРЯН

Р е з ю м е

Смбат Спарапет является одним из крупнейших мыслителей в политико-правовой мысли XIII века. Политико-правовые воззрения Смбата отражены в его знаменитом «Судебнике» и «Летописи». Он дает божественную трактовку происхождения государства и царской власти: «царствование установлено богом, а (царь) считается наместником бога на земле». Смбат выступает за централизованную монархию, в которой церковь подчинена государству. Царь является верховным правителем и носителем суверенной власти. Являясь сторонником монархической формы правления, Смбат не возводил царя в степень «восточных деспотов». Облеченность верховной властью делала царя в действительности «первым среди равных». В политическом учении Смбата уделено много внимания также и проблемам права и законодательства. Он различает следующие виды законов: божественный, светский и церковный (каноны). Цель права, по мнению Смбата — общее благо общества. Весьма интересны и прогрессивны взгляды Смбата, отраженные в правовых нормах, регулировавших брачно-семейные, гражданские, уголовные, трудовые отношения, в вопросах правосудия и законности, войны и мира.

⁶³ Նույն տեղում, էջ 9:

⁶⁴ Այս մասին տե՛ս Ա. Գալստյան, Մոնղոլական շրջանի հայ դիվանագիտության պատմությունից, Լենինական, 1945, Ա. Սուքիասյան, Սմբատ Սպարապետ (Հայ մշակույթի նշանավոր գործիչները, V—XVIII դարեր, Երևան, 1976, էջ 314—320):

⁶⁵ Դատաստանագիրք, էջ 149—150:

THE POLITICAL AND LEGAL VIEWS OF SUMBAT SPARAPET

SAFARIAH G. H.

S u m m a r y

Sumbat Sparapet is one of the major politico-juridical thinkers of his time. His politico-juridical views are expressed in „Taregirk“ (almanach) and in „Datastanagirk“ (Code of Law). Sumbat has explained the rise of the State and Royal Power through the grace of God.

He is in favour of the monarchical system of State rule where the church is subservient to the State. Accepting however the strongly centralized system of monarchical power, Sumbat does not raise the king to the height of eastern despotism, but he considers the king the first of feudal lords. Sumbat attaches great significance to matters of right and legislation. He differentiates the following types of rights—divine, worldly and spiritual (canonical). The aim of right is the general welfare of society. Sumbat has propagated very interesting and progressive ideas regarding marriage, family, civil, criminal and labour norms, legality and justice, war and peace.